

#إسمعوا_من_المسيحيين_متسمعوش_عنهم (٩)

لو المسيح هو الله زي ما بتقولوا، ليه مقالش صراحةً [أنا الله/ربُّكم فاعبدوني]؟

قبل ما اجاوب على السؤال ده ..

عاوز اقول ان السؤال نفسه فيه مغالطة منطقيّة ..

المغالطة دي اسمها false dichotomy ..

وهي انك بتزقّ المسيحي في إجابتين مفيش غيرهم ..

يا إما إنه قال، وبالتالي هو الله، أو مقالش، فمش هو الله!

مع إن الحقيقة ان فيه إجابة تالته انت مقولتهاش ..

وهي إن المسيح قال حاجات كتيرة يؤكّد بيها انه الله ..

من غير ما يقول جملة [أنا الله فاعبدوني] بالذات!

تخيّل مثلاً ان حد سألني [هو مديرك يعرف انك فاسد؟]

هو هنا زنقني في آه أو لأ!

لو قلت آه، أبقى فاسد، ومديري يعرف ..

لو قلت لأ، أبقى فاسد بردو، بس مديري ميعرفش!

بس الحقيقة ان فيه إجابة تالته صحّ هي: أنا مش فاسد!

رجوعاً للسؤال:

المسيح مثلاً قال إنه [أزلي] (الإنجيل بحسب يوحنا ٨:٥٨)

وبسبب كده اليهود كانوا هيرجموه لأنهم فهموه صحّ!

وقال بردو إن هو والله واحد (الإنجيل بحسب يوحنا ١٠:٣٠)

مش بمعنى انه نبي من الله، بيجبّه ومهتم بتكريمه ..

لكن بمعنى انه هو شخصيًّا الله، ليه نفس طبيعة الله ..

وبسبب كده اليهود بردو كانوا هيرجموه، لأنهم فهموه صحّ!

المسيح كمان قال حاجة غريبة جدًّا!

أي حد ممكن يقول إن كل اللي عنده يخصّ الله، ده طبيعي ..

بس مفيش إنسان يقدر يقول إن كل اللي عند الله يخصّه!

المسيح بقى قال كده (الإنجيل بحسب يوحنا ١٧:١٠ و ٢٣:٥)

لو عاوز تعرف أكثر اللي قاله المسيح وعمّله يؤكّد إن هو الله ..

اقرا الكتاب ده: http://www.jesus-for-all.net/christian_books/pdf_047.pdf